

浙江文叢

輿地紀勝

〔第二冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第二冊〕

卷第八至二十

〔宋〕王象之 編著 趙一生 點校

輿地紀勝卷第八

兩浙西路

嚴州

新定

嚴陵

釣臺

桐廬

桐溪

白雉

州沿革

嚴州，望。新定郡。《九域志》。遂安軍節度。《新定志》。《禹貢》：揚州之域。《元和郡縣志》。斗之分野。《春秋元命包》云：『牽牛流爲揚州，分爲越國。』《漢書志》以爲斗之分野。《唐志》據鄭康成之說，以爲星紀之次。國朝《地里志》兩浙路，當南斗、須女之分。春秋時，送入吳、越，此據《元和郡縣志》。尋復屬楚。《晏公類要》云：『楚滅越，其地屬楚。』又《通鑑·周顯王三十六〔五〕年》：『越伐楚，楚大敗之，乘勝盡取吳故地，東至浙江。今嚴州在浙江之西，則其地當屬楚。』秦屬會稽及鄣郡。會稽郡有富春縣，鄣郡有歙縣。西漢屬會稽及丹陽郡。《西漢志》會稽郡有富春縣，丹陽郡有歙縣。東漢屬吳郡及丹陽郡。《東漢志》吳郡有富春〔縣〕，丹陽郡有歙縣。東漢末，吳大帝使賀齊平歙縣，山賊分歙爲始新、新

定、黎陽、休陽四縣，與黟、歙凡六縣，立新都郡，理始新縣。《寰宇記》：在建安十三年。《通鑑》：建安十三年：立新都郡，以賀齊爲太守。吳分吳郡之富春縣，立建德、桐廬、新昌三縣，仍隸吳郡。事見《宋志》。晉武平吳，改新都郡爲新安郡。又改新安縣爲遂安縣、新昌縣爲壽昌縣，宋、齊、梁、陳因之。晉、宋、齊《志》：吳郡下有建德、壽昌、桐廬，新安郡下有始新、遂安二縣。隋文平陳，廢新安郡爲縣，仍置睦州，《隋志》：在仁壽三年。《通典》云：『以俗阜人和、內外輯睦爲義。』領雉山、《隋志》云：『舊置新安郡。平陳，郡廢，爲新安縣。大業初，縣改名。』遂安、《隋志》云：平陳，廢，仁壽中復。桐廬《隋志》云：平陳，廢，仁壽中復。三縣，煬帝廢睦州，改遂安郡。《通典》：隋氏喪亂，陷於寇盜。《元和郡縣志》：唐平汪華，復爲睦州，《皇朝郡縣志》：在武德四年。又以桐廬、分水、建德三縣置嚴州，尋廢嚴州，以桐廬來屬。《唐志》：在武德七年。改睦州爲東睦州，尋復舊。《唐志》以東睦州在武德七年，復舊在八年。太宗分天下爲十道，睦州隸江南道。貞觀元年。初，隋於新安郡故城置睦州。此據《晏公類要》，然新安故城乃始新縣，即今之淳安。至武后時，自新安東移一百六十五里，理建德，即今州理是也。《元和郡縣志》：在萬歲通天二年。而《新定志》在神功元年，不同。象之謹按：《通鑑》：武后萬歲通天二年九月，改元神功，則萬歲通天二年即神功元年耳。在九月以前，即爲萬歲通天二年九月。已後，即爲神功元年。二書所紀，雖有不同。其實一年耳。改新定郡，天寶元年。復爲睦州。在乾元元年。唐末，陳詢以州附于楊行密。《新定志》：在天祐元年。錢鏐陷取其地，《通鑑》：天祐二年：兩浙兵圍陳詢于睦州，陳詢不能守睦州，奔于廣陵。陶雅入睦州。三年，陶雅引兵還歙州，錢鏐復取睦州。五代皆爲

錢氏所有。《五代史》。國朝，錢氏納土，始歸版圖，《國朝會要》及《指掌圖》：在太平興國三年。隸兩浙西路。《國朝會要》：在熙寧七年。後以太宗潛藩，陞爲建德軍節度。《東都事略》云：『太祖受禪，而以太宗領睦州防禦使。』《國朝會要》云：『宣和元年，升建德軍節制。』方臘平，改軍曰遂安軍，州曰嚴州。《國朝會要》：在宣和三年。中興以來，因而不改。令領縣六，治建德。

縣沿革

建德縣，望。

倚郭。《元和郡縣志》云：『本漢富春縣地。吳黃武四年，分置建德縣。』隸吳郡。《寰宇記》云：『吳以封孫韶爲侯。』晉、宋、齊因之。《宋志》云：『吳分富春立建德。』故晉、宋、齊三《志》於吳郡下並有建德縣。《圖經》云：『梁割隸東陽郡。』《輿地廣記》云：『隋省入吳寧。』按吳寧縣，南朝並屬東陽郡，則建德之省入吳寧，是以其縣既廢，而以地入于吳寧，而隸東陽郡耳。《唐志》云：武德四年，於桐廬立嚴州，置建德、分水縣以隸焉。七年，廢嚴州及建德縣，以地入桐廬、雉山。永淳二年復置建德，隸睦州。《輿地廣記》云：萬歲通天二年，睦州自雉山縣移理於此。《寰宇記》云：『隋末，立郡於此。』然隋末立郡乃在淳安，非建德也。《寰宇記》所紀非是。

淳安縣，望。

在州西一百六十里。《元和郡縣志》云：『本漢歙縣地。』《通鑑》（吳大帝）「漢獻帝」〔建安十三年〕：

『孫權』^{〔四〕}使賀齊平黠、歙縣賊，權乃分其地爲新都郡，以賀齊爲太守。『《元和郡縣志》：『新都郡理始新縣。』則是建安十年，已立始新縣矣。而《元和志》於始新縣下書云：『黃武元年，立始新縣。』不應建安先立新都郡。而黃武始立始新縣，則立始新縣當在建安十三年。晉改郡爲新安，縣名仍舊。故《晉志》及《南齊志》新安郡猶治始新。《隋志》云：『平陳，廢新安郡爲新安縣。仁壽三年，於縣置睦州。煬帝大業初，改新安縣爲雉山縣，改睦州爲遂安郡，治雉山。』《元和志》又云：『晉改始新爲雉山。』然《晉志》及《南齊志》並無雉山縣，則雉山非置於晉也。《唐志》云：『睦州本治雉山。文明元年，改雉山曰新安。』《元和志》云：『萬歲通天二年，自新安東一百六十五里徙治建德。』今以諸縣去郡里數考之，惟淳安去州一百六十五里，則故新都郡及睦州舊治淳安。《唐志》又云：開元二十年，改曰還淳。《寰宇記》云：『永（正）貞』^{〔五〕}元年，改爲青溪^{〔六〕}，避憲宗名也。』《國朝會要》云：宣和三年，平方臘，改曰淳安。

桐廬縣，上。

在州北一百五里。《元和郡縣志》云：『本漢富春縣之桐溪鄉。黃武四年，分富春縣地置桐廬縣，以居桐溪，地名桐廬。』初隸吳郡，故晉、宋、南齊《志》吳郡下並有桐廬縣。《隋志》云：『平陳，廢桐廬縣，仁壽中復置。』屬睦州。《唐志》云：『武德四年，以桐廬縣置嚴州，而桐廬、分水、建德三縣隸焉。七年，州廢，以縣屬睦州。』《圖經》云：『光化三年，錢鏐割隸杭州。』《國朝會要》云：太平興國二年，錢氏納土，詔還隸睦州。』《寰宇記》載《耆舊相傳》云：『桐溪側有大（猗）〔椅〕』^{〔七〕}桐樹，垂條偃蓋，蔭數畝，遠望似廬，故爲桐廬縣也。』

分水縣，中。

在州北一百九十二里。《寰宇記》云：『本桐廬縣之西鄉也。唐武德四年，析桐廬縣以置之。』《唐志》云：『武德七年，省入桐廬。如意元年，復置，更名武盛。神龍元年，復故名。寶應二年，析置昭德縣。大曆六年，省昭德，入分水。』

遂安縣，中。

在州西南二百二十九里。《元和郡縣志》云：『吳大帝使賀齊平黟、歙，分縣之南鄉安定里置新定縣。』屬新都郡。晉武太康元年，改爲遂安縣，屬新安（縣）「郡」^{〔八〕}。宋、齊因之，故《宋志》、《南齊志》新安郡下並有遂安縣。《隋志》於遂昌縣下注云：『平陳，廢。仁壽中，復置。』隸睦州。唐及皇朝因之。

壽昌縣，中。

在州西南一百一十五里。《輿地廣記》云：『本雉山縣地。』《唐志》云：『永昌元年，析雉山縣地置壽昌縣。載初元年，省。神龍元年，復置。』皇朝因之。然《唐志》以爲分雉山縣置，而《通典》及《元和志》以爲分富春縣置，二者皆不同。象之謹按：壽昌在今嚴州之西南一百一十五里，而富春在今嚴陵之東北垂二百里，不應差互若此，蓋自吳分富春置新昌縣，晉太康元年，又改爲壽昌。《圖經》云：梁割隸新安郡。隋併入新安。至唐

文明元年，改新安爲雉山。永昌元年，析雉山縣地置壽昌縣。《唐志》不言爲壽昌故邑，是其名適同，或移舊縣額於此建置，非必拘之以爲其地初屬富春縣也。至《寰宇記》牽於二者之說，遂以壽昌在秦爲歙縣，在漢爲富春之境，隋改新安爲雉山，強欲附會而未必得其實也。以今縣治地里考之，當從《唐志》曰析雉山縣置壽昌。

風俗形勝

太宗防禦使，建隆元年，詔授持節睦州諸軍事，行睦州刺史，充本州防禦使。高宗節度使。宣和三年，詔特授太保，遂安、慶源等軍節度使。據古鄆會稽之地，合東陽歙溪之水，近當甌歙數道之衝，南出交廣五嶺之會。錢鏐《浮橋記》。山峻二江，合會之勢，李道古《大廳記》。新安、東陽二水合流爲浙江，《十洲記》。江流當歙、婺二港之衝。錢聞詩《懷「懷」^{〔九〕}水疏》。吳中勝概，浙右奧區，環繞翠山，練傾澄瀨。刁衍《大廳記》。建邦于山谷之間。田錫《夫子廟記》。浙江之右，桐溪之濱，同上。郡之山川接于新安，誰謂幽遐滿目奇勝，衢、歙二水合于城隅，一清一濁，如濟如河，群峰四來，翠盈軒窗，范仲淹《與晏尚書書》。山川清絕，塗陸坦平，群峰回環，一水縈帶，述以晉宋文士，信乎吳越佳郡。蘇頌《靈香閣記》。嘗謂桐廬郡自晉宋以來，文士多稱述之。觀夫城邑間井，皆坦塗平陸，蓋與它州無以異也。及登高而望，則群峰回環，一水縈帶，煙雲晦靄，朝莫異狀，不離指顧，而萬景在目，述以晉宋文士，信爲吳越之佳郡。隋更郡曰新定，唐置州於桐廬，隋更名新定，唐即桐廬縣置嚴州。並《嚴陵集序》。以輯睦得名，董弇《序》。因嚴陵紀號。同上。可以無事治，不可以多事理。劉文富重修「志」^{〔一〇〕}序曰：此邦之俗，舊號輯睦，因以名州。新安泉石最爲佳。張伯玉詩。新安大好山水。徐摛爲太守，梁武

帝召之曰：新安大好山水，任昉等並曾爲之。新安江水至清。沈約詩序云：新安江水至清，淺深見底。州在萬山中。《杜牧集》：州在萬山之中。閣在千嶺前。蘇頌詩：『寒光閣在千嶺前。』浙江上游。錢鏐《浮橋記》：地據浙江上游。吳會裨郡。趙抃《學進士「題名」》^{〔一〕}記：睦於吳會爲裨郡。制勝壤於浙江。高宗《除節度使制》。山水清絕。董弁《序》曰：惟嚴爲州山水清絕。溪山秀妙。桐廬溪山秀妙，陸魯望所謂清涼國。錦峰繡嶺。在桐廬縣嚴陵山，錦峰繡嶺，乃子陵隱居之所。錦山繡嶺。王粲《釣臺詩集》：嚴陵山水，清麗奇絕，號錦山繡嶺。山高水長。范文正公《嚴先生碑》。水綠山青，劉涇詩：水綠山青人可知。人和俗阜。《寰宇記》云：取其人和俗阜，內外輯睦爲名。水疊山重。貫休詩：水疊山重擎草疏。山環翠而繚繞，溪練素以縈紆。嚴州大體。州境山谷居多，地狹且瘠，民貧而嗇，穀食不足，仰給他州。惟蠶桑是務，且烝茶割漆，以要商賈貿遷之利。《圖經序》。全名直節，見推于時。今代如江民表全名直節，見推于時，文采蓋其餘。騷人名士，過焉而賦。騷人名士，過焉而賦。在晉則謝康樂，梁則沈隱侯，唐則李太白，孟浩然，白樂天，本朝則梅聖俞，蘇子美，龐莊敏公，王文公。名山美石，使人忘朱門之志。冠軍吳喜云云。事見錦沙村下。浙水之原。《劉長卿集·祭睦州閭使君文》云：『浙水之原，剖竹來過。』浙右之疆，包流山川，控帶六州，天下盛府也。國之盈虛，於是乎在。李元賓《浙東觀察判官廳壁記》。嚴當爲莊。《容齋隨筆》云：嚴州本名睦州。宣和中，以方寇之故改焉，雖以威嚴爲義，然實取嚴陵灘之意也。殊不知子陵乃莊氏，東漢避顯宗諱以莊爲嚴，故史家追書以爲嚴光，後世當從實可也。

景物上

浙江 《元和郡縣志》云：『在州南十里。又有東陽江，南自婺州界來，至州南注浙江。』

寒瀨 龐籍詩：『翠岫臨寒瀨。』

石瀨 司馬光詩：『羊裘釣石瀨。』

玉泉 今出城北，烏龍山之趾，其水甘香，尤宜茶。

寶鼎 《寰宇記》云：『吳甘露元年，孫韶於水濱得大鼎，改元寶鼎。』

繡嶺 在桐廬縣。

錦沙 詳見錦沙村下。

香城 徐凝《游安禪寺詩》：『先觀湧塔出香城。』

山館 白居易《桐廬館詩》：『雨滴梧桐山館秋。』

鼉石 去壽昌縣十二里，有大石如鼉倨于道。舊傳昔有鼉伏草間，化爲茲石。

龍井 在遂安，有廟。

龍峰 趙抃詩：『占得龍峰作畫屏。』

燕山 《晏公類要》云：『在壽昌縣西二十里。每亢陽有煙霧橫其上，群燕集即雨，因以名之。』

雉山 隋嘗取以名縣。《晏公類要》云：『在淳安縣西一里。《新安記》曰：郡西南，渡水一里餘，有雉

山，形如雉。又《寰宇記》：壽昌亦有雉山。

鳳林 在遂安，鄉名。

木瀨 江名。

桐溪 《寰宇記》：（本）「在」桐廬縣。一名紫溪水，木泉石相映名灘，自桐溪至於潛乃十六瀨，第二瀨，即嚴陵灘也。

桐江 《晏公類要》云：在桐廬北三里。源出天目山，即桐廬江也。

蔗山 《晏公類要》云：在淳安縣東。

橋山 在東陽江南，去城十餘里。山如石筍，而不可登，上有橘一株，熟時風飄墮地。

梅嶺 《晏公類要》云：在壽昌縣南四十里。

戴山 在桐廬。詳見戴顒隱居下。

朱池 漢朱買臣避吳王濞之亂至此，曰：水香而善，因築室讀書，鑿池爲滌硯所。後人名之曰朱池，

去城三十里。

胥水 伍子胥逃難抵此，因名胥村、胥水、胥嶺。

嚴瀨 子陵釣處爲名。

洞巖 在壽昌縣西四十里。洞極深邃，盛夏人或火而入，至其深處，寒不可禦。李頻有詩。

乳洞 在永平鄉。深可數里，泉溜凝結如乳。

釣臺 子陵坐釣之所。

界山 《寰宇記》云：『在建德縣。』《郡國志》云：『界山欲雨，輒聞鐘鼓之聲，與人擊之無異。』

景物下

清涼國 《新定志》云：桐廬山溪秀妙。陸魯望所謂清涼國。

瀟灑郡 范文正公詩：『瀟灑桐廬郡。』

瀟灑樓 在州宅之北，宣和三年建。

清芬閣 范文正公《贈方處士詩》曰：『有泉皆（瀨）「漱」石，無地不生雲。鄰里多垂釣，兒孫半

屬文。幽蘭在深處，終日自清芬。』方氏因建清芬閣。

紫翠樓 在州宅北子城下。知州呂希純有詩。

甘棠樓 在善利門北角，俯臨西湖。

深渡館 唐朱長文宿新安江深渡館，有詩云：『孤館閉寒水，大江生夜風。』

環溪亭 唐方干《題睦州呂郎中郡內環溪亭詩》云：『閑花半落猶邀蝶，白鳥雙飛不避人。』

湖光亭 在平和門之外，南跨西湖。郡守胡寅建。

客星閣 釣臺有閣曰客星，軒曰羊裘。

館仙洞 在桐廬縣西北五十里。洞門有石壁，乳竇交映，飛泉噴射，入其中不知所窮。

迎仙閣

在子城西北。乃康希仙上昇之地，名其閣曰迎仙閣。

招隱臺

在釣臺。

讀書樓

熙寧初，吳儁中賢良。

賞春亭

在州衙後門，趙清獻公建。

千峰榭

州宅北偏，自唐有之。范文正公重建，紹興間潘良貴復名千峰榭。

羊裘軒

見釣臺門。

空濛山

在縣南十八里，高五百丈，周圍七十里。出衆山之表，天欲雨，雲霧先蔽其上。

清白泉

《圖經》云：在建德縣衙後。

白石山

《隋志》桐廬縣下有白石山。《元和郡縣志》云：『在遂安縣西七十里。其山出白石英，貢，

因以爲名。《寰宇記》：『在桐廬縣。』又云：『山有印渚，渚多巉石。』

白雲源

方處士所居曰白雲源。

白雲亭

在分水。詳見人物門羅萬象下。

紫邏山

在分水。詳見人物門羅萬象下。

黃連嶺

《晏公類要》云：在遂安縣之南七十里。山路險阻，言行人度嶺者，皆口苦如咀黃連。

烏龍山

《晏公類要》云：在州城北一里。元祐三年立廟。

白馬源

方臘既平，白馬源民繆羅復倡亂，未幾平云。

金牛山

《晏公類要》云：『在桐廬縣東南十五里。』

金雞巖

在壽昌縣西六十里。《耆舊相傳》云：『昔有異人過此，聞石中有雞聲，遂剖石得一物如雞，而

金色崑上有石竅。見存。

馬目山

在州西南。亦名□□山，上有廟。

馬鞍山

《郡國志》云：『芙蓉湖西馬鞍山，季札遜位耕於此。』

鳳山院

在建德。

龍門寺

在桐廬縣。

龍泉院

在淳安縣。江公望記文在本院。

孤亭山

《東觀漢記》：『子陵隱於孤亭山。』

三雄山

《郡國志》云：『山有顯庭石門故關，多牛馬跡在石上。』事見《寰宇記》，云在建德縣。

七里灘

距州四十餘里，與嚴陵灘相接。《通典》：建德縣有七里灘。《元和郡縣志》云：『在建德縣

東北(七)「一十」^{〔十四〕}里。』諺云：『有風七里，無風七十里。』《寰宇記》云：『即富春渚是也。』

百合池

《晏公類要》云：『在分水縣東六十二里。』

銅官山

在州西北八十里。《新安記》云：『秦時於此置官採銅，因以名之。』

玉泉庵

在城外。名公多留題。

玉華山

在分水縣城北，有泉玉色。

石柱山 在分水縣東二十里，有石如柱。

石壁山 在分水縣東十五里。州南十五里亦有石壁，臨東陽江。

石英山 《唐志》遂安縣下有石英山。

錦沙村 《寰宇記》：『在淳安縣。』按《新安記》云：『錦沙村傍山依壑，素波澄映，錦石舒文。冠軍吳

喜聞而造焉。鼓枻游泛，彌旬忘返，嘆曰：「名山美石，故不虛賞，使人忘朱門之志。」』

天井山 《寰宇記》：『在壽昌縣。』《輿地志》云：『壽昌縣有天井山，天將降雨，頂上輒有鐘鼓之

聲響。』

天目渡 《晏公類要》云：在分水縣東。

桐君山 在桐廬。有人採藥結廬桐（本）「木」^{〔一五〕}下，人問其姓，指木示之，因名山曰桐君山，江曰桐

江，嶺曰桐嶺。

僧父溪 《晏公類要》云：在分水縣東五里。歲旱，禱之。

孝子泉 《九域志》云：『州民夏孝先喪父，廬於墓側，有泉湧出其地。』

織女山 《晏公類要》云：山在遂安縣南十里，有祠。

織女廟 《晏公類要》云：廟在遂安縣南五里。

仙壇山 《隋志》遂安縣下有仙壇山。

靈巖山 《晏公類要》云：在淳安縣。

靈巖洞

在遂安縣西十五里。崑上有泉，分注三井，溢爲瀑布二百尺許。

神泉監

《九域志》云：『在州東五里。熙寧七年，置鑄銅錢。』慶元、開禧間，又增收諸道銅器，鑄銅

錢拾萬貫。今廢。

印渚渡

《晏公類要》云：在分水縣。

香爐山

《晏公類要》云：在桐廬西二十五里。山形遠望相似。

嚴陵山

嚴陵瀨

《輿地廣記》曰：即嚴子陵之所隱也。《輿地志》云：『桐廬有嚴陵山，境尤勝麗，

夾岸是錦峰繡嶺，即子陵所隱之地。』見《寰宇記》。

富春渚

任昉詩曰：『朝發富春渚。』

新安江

《元和郡縣志》云：『自歙州黟縣界流入縣，東流入浙江。』今在州城南。

壽昌溪

發源鵝籠山，溉田四百頃。

桐廬江

《元和郡縣志》云：『源出杭州於潛縣界天目山，南流至桐廬縣東一里，合浙江。』

公山江

《寰宇記》：在建德。《郡國志》云：『山有橘，自然泛來，行人噉之，恣飽則可，將去則病。』

都督山

《寰宇記》云：『在建德縣。』《郡國志》云：『山極高峻，臨江。土居人投石以占吉凶。』

吳氏山

在建德。天寶中，以山下多吳姓，因以名山。

垂雲洞

在桐廬縣西北五十里。初入洞口有雷風，行數步則石門曠然明徹，上有洞穴，仰瞰晴空，如

別有天。又三十步次至石堂，可容百人。復多石佛，舊名石佛洞。唐時縣令劉文會改今名。

定川門

城門直州衙曰望江，紹興初吕子進以門名淺近，適召水災，乃改曰定川，自是無復水患。

古跡

秦游山

在分水縣東十七里。故老相傳秦始皇游天目山，庶民於此山覲見。

朱池

距城三十里。相傳朱買臣讀書處，其東有朱太守祠。唐李頻爲之《記》。

嚴子陵釣臺

《元和郡縣志》：『在桐廬縣西三十里浙江北岸。』《通典》桐廬縣下有嚴子陵釣臺。又

《圖經》云：在桐廬縣。景祐初，范文正公建祠東西二臺，祠中繪子陵像，附以方干處士。

吳孫韶得大鼎

《寰宇記》云：『甘露元年，吳孫韶於建德水濱得大鼎，進之吳主，因改元寶鼎。』

道士影

在分水之生仙鄉。昔有二人入山得道，石壁留二人影如道士狀，晴日視之宛然。

伍胥祠

在□□縣東南七十五里。胥湖西岸，昔伍相因行過此，後人悲而憶之，因名胥湖，并爲立廟。

宋齊邱祠

在淳安縣昌期鄉。舊傳齊邱嘗避地居于此。

粵王墓

在淳安縣昌期鄉。舊傳粵王兵敗至此而死，因葬焉。有三墳，各高二十餘丈，不知其爲何粵

王也。

朱買臣墓

在建德縣之幽徑山。

官吏

吳·賀齊，吳孫權以齊爲太守，平山越，分置諸縣。

孫韶，吳以封韶爲建德侯。《寰宇記》云：『孫